

四庫全書

史部

欽定四庫全書

舊五代史卷四十一

宋門下侍郎參知政事監修國史薛居正等撰

唐書第十七

明宗紀七

長興元年春正月丙寅朔帝御明堂殿受朝賀仗衛如
常儀乙亥國子監請以監學生束脩及光學錢備監中
修葺公用從之丙子帝謂宰臣曰時雪未降如何馮道

曰陛下恭行儉德憂及烝民上合天心必有春澤是夜
降雪其夕右散騎常侍蕭希甫封狀申樞密稱得河堰
衙官狀告本都將校二十餘人欲謀不軌至旦追問無
狀斬所告人是日幸至德宮辛卯中書奏郊天有日合
差大內畱守詔以宣徽南院使朱弘昭充二月戊戌幸
稻田莊己亥黑水國主兀兒遣使貢方物翰林學士劉
昫奏新學士入院舊試五題請今後停試詩賦祇試麻
制答蕃書批答共三道仍請內賜題目定字數付本院

召試從之

五代會要載劉昫原奏云舊例學士入院除中書舍人不試餘官皆先試麻制各蕃批答

各一道詩賦各一道號曰五題並於當日呈納從前每遇召試多預出五題潛令宿構其無黨援者即日起草罕能成功今請權停詩賦祇試三道仍內賜題目兼定字數從之有司奏皇帝致齋于

明堂按舊服通天冠絳紗袍文武五品已上著袴褶近

例祇著朝服從之乙巳中書奏皇帝朝獻太微宮太廟

祭天地于圜丘準禮例親王為亞獻行事受誓戒從之

以天雄軍節度使石敬瑭為御營使壬子帝宿齋于明
堂殿癸丑朝獻太微宮是日宿齋于太廟詰旦請行饗

禮甲寅赴南郊齋宮是夜微雨三鼓後晴明如晝乙卯
祀昊天上帝于圜丘柴燎禮畢郊宮受賀是日御五鳳
樓宣制改天成五年為長興元年大赦天下除十惡五
逆放火劫舍屠牛官典犯賊偽行印信合造毒藥外罪
無輕重咸赦除之天成四年終諸道所欠殘稅及場院
欠折並特放免羣臣職位帶平章事侍中中書令並與
改鄉名里號朝臣及蕃侯郡守亡父母及父母在并妻
室未沾恩命者並與恩澤應私債出利已經倍者祇許

徵本已經兩倍者本利並放河陽管內人戶每畝舊徵
橋道錢五文今後不徵諸道州府每畝先徵麴錢五文
今特放二文云商州吏民以刺史郭知瓊善政聞詔褒
之三月丁卯幸會節園遂幸河南府靈武奏殺戮蕃賊
二千人壬申鳳翔節度使李從暉進封岐國公移鎮汴
州甲戌延州節度使高允韜移鎮邢州丙子以宣徽使
朱弘昭為鳳翔節度使潞州節度使朱漢賓加檢校太
傅移鎮晉州徐州節度使房知溫移鎮鄆州鄆州節度

使王晏球移鎮青州宰臣馮道率百寮拜表請上尊號
曰聖明神武文德恭孝皇帝詔報不允壬午許州節度
使孔循移鎮滄州陝州節度使張延朗移鎮許州加檢
校太傅滄州節度使張虔釗移鎮徐州加檢校太保癸
未詔貶右散騎常侍集賢殿學士判院事蕭希甫為嵐
州司戶參軍仍馳驛發遣坐誣告之罪也宰臣馮道等
再請上尊號詔允之丙戌以侍衛親軍馬步軍都指揮
使河陽節度使康義誠為襄州節度使檢校太傅以左

武衛上將軍劉彥琮為陝州節度使檢校太保庚寅制
淑妃曹氏可立為皇后仍令擇日冊命夏四月甲午朔
國子司業張洎奏請復八館以廣生徒按六典監有六
學國子太學四門律學書學算學是也而洎云八館謬
矣丁酉前汴州節度使檢校太尉兼侍中符習可太子
太師致仕進封衛國公戊戌遂州節度使夏魯奇加同
平章事皇子河中節度使從珂進位檢校太尉封開國
公自是諸道節鎮皆次第加恩以郊裡覃慶澤故也已

亥辛會節園壬寅以樞密使安重誨為畱守太尉兼中書令使如故青州節度使王建立加侍中移鎮潞州皇子河中節度使從珂奏臣今月五日閱馬于黃龍莊衙內指揮使楊彥溫據城叛臣尋時詰問稱奉宣命

胡三省通

鑑注云樞密院用宣三省用堂帖

臣見在虞鄉縣帝遣西京畱守索自

通侍衛步軍都指揮使藥彥稠等攻之仍授彥溫絳州刺史冀誘而擒之也詔從珂赴闕丁未以戶部尚書李鱗為兗州行軍司馬坐引淮南覘人貽安重誨寶帶也

戊申宰臣馮道加右僕射趙鳳加吏部尚書乙酉以左
龍武統軍劉君鐸卒廢朝癸丑索自通藥彥稠等奏收
復河中斬楊彥溫傳首來獻初彥稠出師帝戒之曰與
朕生致彥溫吾將自訊之及收城斬首傳送帝怒彥稠
等時議皆以為安重誨方弄國權從榮諸王敬事不暇
獨忌從珂威名每于帝前屢言其短巧作窺圖冀能傾
陷彥溫既誅從珂歸清化里第重誨謂馮道等曰蒲帥
失守責帥之義法當如何翼日道等奏合行朝典帝不

悅趙鳳堅奏故事有責帥之義所以激勵藩守帝曰皆非公等意也後數日帝于中興殿見宰臣趙鳳承重誨意又再論列帝默然翼日重誨復自論奏帝極言以拒之語在末帝紀中帝又曰卿欲如何制置重誨曰于陛下父子之間臣不合言一稟聖旨帝曰從佗私第間坐何煩奏也乃止以前邢州節度使檢校司徒李從溫為左武衛上將軍丙辰以西京畱守檢校司徒索自通為河中節度使丁巳雲州奏掩襲契丹獲頭口萬計戊午

帝御文明殿受冊徽號冊曰維長興元年歲次庚寅四月甲午朔二十五日戊午金紫光祿大夫守尚書左僕射兼門下侍郎同中書門下平章事充太微宮使弘文館大學士上柱國始平郡開國侯食邑一千五百戶食實封一百戶臣馮道銀青光祿大夫門下侍郎兼吏部尚書同中書門下平章事監修國史判集賢院事上柱國天水郡開國伯食邑七百戶臣趙鳳及文武百官特進太子少傅上柱國酒泉郡開國侯食邑一千戶臣李

琪等五千八百九十七人言臣聞天不稱高而體尊地
不矜厚而形大厚無不載高無不覆四時行于內萬物
生其間總神祇之靈叶帝王之運日出而星辰自戢龍
飛而雷雨皆行元氣和而天下和庶事正而天下正伏
惟皇帝陛下天授一德時歷多艱翊太祖以興邦佐先
皇而定難拯嗣昭于潞因救德威于燕危遏思遠而全
鄴都誅彥章而下梁苑成再造之業由四征之功洎纂
鴻圖每敷皇化去內庫而省庖膳出宮人而減伶官輕

寶玉之珍却鷹鷂之貢淳風旣洽嘉瑞自臻故登極之
前人皆不足改元之後時便有年遐荒旋斃于戎王重
譯徑來于蠻子東巡而守殷殪北討而王都殲破契丹
而燕趙無虞控靈武而瓜沙並復近以饗上元而薦太
廟就吉土而配昊天輅已降而雨霑事欲行而月見燭
柴禮畢作解思覃帝命咸均人情普悅非陛下有道有
德至聖至明動不疑人靜惟恭已常敦孝禮每納忠言
則何以臨御五年澄清四海時久纏于災害民驟見于

和平休徵備載于簡編徽號過持于謙讓三年不允衆
志皆堅天不以上帝自崇日不以大明自貴于烝民有
惠于元后同符烈聖皆然舊章斯在今以明庭百辟列
土諸侯中外同辭再三瀝懇臣等不勝大願謹奉玉寶
玉冊上號曰聖明神武文德恭孝皇帝伏惟皇帝陛下
體堯舜之至道法日月于太虛威于夷狄恩及蟲魚奉
國者繼加榮寵遠天者成就誅鋤典禮當告成之後夙
夜思卽位之初千秋萬歲永混車書宰臣馮道之辭也

庚申以左金吾上將軍史敬鎔為鄧州節度使以右金吾上將軍符彥超為兗州節度使以驍衛上將軍張敬詢為滑州節度使以閬州防禦使孫岳為鳳州節度使詔改鳳翔管內應州為匡州信州為晏州改新州管內武州為毅州五月乙丑鄭州防禦使張進副使咸繼威並停任以盜掠城中居人故也丙寅以少府監韋肅為洛州刺史以潞州節度使王建立為太傅致仕建立素與安重誨不協因其入朝乃言建立自鎮歸朝過鄴都

日有扇搖之言以是罪之故令致仕丁卯以前興元節度使劉仲殷擢知潞州軍州事戊辰以安州節度使高行珪卒輟朝有司上言皇后受冊內外命婦並合奉賀今未有命婦準例上表稱賀中書諸道節度使但進表上言皇帝外命婦上皇后賀牋表進呈訖無報應皇親或有慶賀及起居章表內中進呈後祇宣示來使並不合答復從之壬申以權知昭義軍軍州事劉仲殷為潞州節度使檢校太傅丁丑帝臨軒命使冊淑妃曹氏為

皇后禮院上言百官上疏于皇后曰皇后殿下及六宮
及率土婦人慶賀祇呼殿下不言皇后中書覆奏若祇
呼殿下恐與皇太子無所分別凡上中宮表章呼皇后
殿下若不形文字尋常祇呼皇后從之癸未太子少傅
蕭頊卒廢朝甲申迴鶻可汗仁裕遣使貢方物辛卯以
翰林承旨兵部侍郎李愚為太常卿壬辰以前滑州節
度使李從璋為右驍衛上將軍六月丁酉以獲駕馬軍
都指揮使貴州刺史安從進為宣州節度使充護駕馬

軍都指揮使以獲駕步軍都指揮使澄州刺史藥彥稠為壽州節度使兼獲步軍都指揮使甲辰以皇城使安崇緒為河陽留後重誨子也鳳翔奏所管良晏匡三州並無屬縣請却改為縣從之仍舊為軍鎮前振武節度使安金全卒壬子中書門下奏詳覆到禮部院今年及第進士李飛樊吉夏侯珙吳洵王德柔李穀等六人望放及第其盧價等七人及賓貢鄭朴望許令將來就試知貢舉張文寶試士不得精當望罰一季俸從之丁巳

皇子北京畱守河東節度使從厚移領鎮州以左武衛
上將軍李從溫為許州節度使秋七月甲子以宣徽南
院使行右衛上將軍判三司馮贇為北京畱守太原尹
已巳以鄆州節度使史敬銘卒廢朝甲戌以左威衛上
將軍梁漢顥為鄆州節度使前兗州節度使趙在禮為
左驍衛上將軍庚辰奉國軍節度使兼威武軍節度副
使檢校太尉兼侍中王延稟加兼中書令詔諸州得替
防禦團練使刺史並宜于班行比擬如未有員闕可隨

常參官逐日立班新例也辛巳詔揀年少宮人及西川
宮人並還其家無家可歸者任從所適甲申以前齊州
防禦使孫璋為鄆州節度使戊子以右散騎常侍陸崇
卒廢朝崇為福建冊使卒于明州贈兵部尚書宿州進
白免安重誨謂其使曰豐年為上瑞兔懷狡性雖白何
為命退歸八月甲午以前鄆州節度使盧文進為左衛
上將軍北京奏吐渾千餘帳內附于天池川安置禁在
京百司影射州縣稅戶乙未捧聖軍使李行德十將張

儉告密人邊彥溫並族誅以其誣告安重誨私市兵仗故也以前許州節度使張延朗為檢校太傅行兵部尚書充三司使三司之有使額自延朗始也初中書覆奏授延朗諸道鹽鐵轉運等使兼判戶部度支事奏入宣旨曰會計之司國朝重事將總成其事額俾專委于近臣貴使一時何循往例兼移內職可示親規張延朗可充三司使班在宣徽使下癸卯北京奏生吐渾內附欲于嵐州安族帳都官員外郎知制誥張昭遠奏請依國

朝舊例選郎官御史分行天下宣問風俗興利除害不
報壬寅皇子河南尹判六軍諸衛事從榮封秦王仍令

所司擇日冊命

五代會要長興元年九月太常禮院奏
草定秦王儀注博士段顥議曰據開元

禮臨軒冊禮命諸王大臣其日受冊者朝服從第鹵簿
與百官俱集朝堂就次受冊訖通事舍人引不載謁朝
還第之議自開元以後冊拜諸王皆正衙門命詣延英
進冊皇帝御內殿高品引王入立于位高品宣制讀冊
王受冊訖歸院亦無乘輅謁朝之禮臣按五禮精義云
古者皆因神嘗而頒爵祿所以示無自專票之於祖宗
也今雖冊命不在燕嘗然拜大官封大邑必至殿廷敬
慎之道也今常司欲准開元禮其日秦王服朝服自理
所乘輅車備鹵簿與群臣俱集朝堂就次受冊訖至應
天門外奉冊置于載冊之車秦王升輅出謁太廟訖歸

理儀仗鹵簿
來時之儀從

如戊申兗州奏淮南海州都指揮使王傳拯

殺本州刺史陳宣焚燒州城以所部兵士及家口五千
入歸國至沂州帝遣使慰納之庚戌正衙命使冊福慶
長公主孟氏以前雄武軍節度使王思同為左武衛上
將軍以前鳳州節度使陳臯為右威衛上將軍壬子正
衙命使赴大原冊永寧公主石氏乙卯以左監門衛上
將軍陳延福卒廢朝丙辰皇子鎮州節度使從厚封宋
王仍令擇日冊命九月乙丑階州刺史王弘贇上言一

州主客戶纔及千數並無縣局臣今檢括得新舊主客已及三千二百欲依舊額立將利福津二縣請置令佐從之丁丑詔天下諸州府不得奏薦著紫衣官員為州縣官戊寅升尚書右丞為正四品癸未利閬遂三州奏東川節度使董璋謀叛結連西川孟知祥甲申以鎮州節度使范延光為檢校太傅守刑部尚書充樞密使利州閬州進納東川檄書言將兵擊利閬責以間諜朝廷為名乙酉以左驍衛上將軍趙在禮為同州節度使兼

四面行營馬步軍都指揮使樞密院直學士守工部侍郎闕至樞密院直學士守尚書右丞史圭並轉戶部侍郎依前充職以翰林學士守戶部侍郎李擇為尚書右丞以翰林學士戶部侍郎劉昫為兵部侍郎以翰林學士中書舍人竇夢徵為工部侍郎依前充職以中書舍人劉贊為御史中丞以御史中丞許光義為兵部侍郎以兵部侍郎姚顗為吏部侍郎丙戌詔東川節度使董璋可削奪在身官爵仍徵兵進討丁亥以西川節度使

孟知祥兼西南面供饋使天雄軍節度使石敬瑭兼東川行營都招討使以遂州節度使夏魯奇兼東川行營招討副使庚寅以右衛上將軍王思同為京兆尹充西京留守兼西南行營馬步都虞候冬十月壬辰以太子少傅李琪卒廢朝癸巳以鄜州節度使米君立卒廢朝詔凡賻贈布帛言段不言端匹段者二丈也宜令三司依此給付甲午正衙命使冊興平公主于宋州節度使駙馬都尉趙延壽之私第己亥以左驍衛上將軍李從

璋為陝州節度使陝州節度使劉彥琮移鎮邠州尚書

博士田敏請依舊典藏冰頒冰以銷陰陽愆伏之沴詔

從之

五代會要載原勅云藏冰之制載在前經獻廟之儀廢于近代既朝臣之特舉案典禮以宜行田敏

所奏案司寒獻羔事宜依其挑弘棘矢事久不行理難備創具諸侯亦宜准往制藏冰乙巳供奉

官張仁暉自利州迴奏董璋攻陷閬州節度使李仁矩

舉家遇害丁未宮苑使董光業并妻子並斬于都市璋

之子也辛亥以武安軍節度副使洪鄂道行營副都統

檢校太尉馬希聲為武安軍節度使加兼侍中時湖南

馬殷奏久病不任軍政乞以男希聲為帥故有是命中
書奏吏部流內銓諸色選人所試判兩節度欲委定其
等第文優者超一資其次者次資又次者以同類道理
全疎者于同類中少人戶處注擬從之十一月庚申朔
帝御文明殿冊皇子秦王仗衛樂懸如儀甲子正衙命
使冊皇子宋王于鎮州是日幸龍門翼日馮道奏曰陛
下宮中無事遊幸近郊則可矣若涉歷山險萬一馬足
蹉跌則貽臣下之憂臣聞千金之子坐不垂堂百金之

子立不倚衡况貴為天子豈可自輕哉帝斂容謝之退
令小黃門至中書問道垂堂倚衡之義道因注解以聞
帝深納之己巳故太子少保致仕封舜卿贈太子少傅
庚午應州節度使張敬達移雲州以捧聖都指揮使守
恩州刺史沙彥詢為應州節度使以潁州團練使高行
周為安北都護充振武節度使壬申黔南節度使楊漢
章棄城奔忠州為董璋所攻也乙亥制西川節度使孟
知祥削奪官爵以其同董璋叛也丙子以前同州節度

使羅周敬為左監門上將軍丁丑故兵部侍郎許光義
贈禮部尚書辛巳西面軍前奏今月十三日階州刺史
王弘贄瀘州刺史馮暉自利州取山路出劍門關外倒
下殺敗董璋守關兵士三千人收復劍州甲申日南至
帝御文明殿受朝賀丙戌以給事中鄭韜光為左散騎
常侍青州奏得登州狀契丹按巴堅男東丹王托雲越
海來歸國

契丹國志東丹王失職怨望
率其部四十人越海歸唐

十二月乙未荆

南奏湖南節度使楚國王馬殷薨廢朝三日庚子以前

襄州節度使安元信為宋州節度使辛丑幸苑中丁未
以二王後祕書丞襲鄒國公楊仁矩卒輟朝贈工部郎
中庚戌湖南節度使馬希聲起復加兼中書令壬子以
樞密院直學士戶部侍郎閻至為澤州刺史樞密院直
學士戶部侍郎史圭為貝州刺史甲寅遣樞密使安重
誨赴西面軍前時帝以蜀路險阻進兵艱難潼關已西
物價甚賤百姓輓運至利州率一斛不得一斗謂侍臣
曰關西勞擾未有成功誰能辦吾事者朕須自行安重

誨曰此臣之責也臣請行帝許之言訖而辭翼日遂行
甲寅故西川兵馬都監泗州防禦使李嚴贈太傅丙辰
車駕畋于西山臘也丁巳迴鶻遣使來朝貢戊午故荆
南節度使檢校太尉兼尚書令南平王高季興贈太尉



舊五代史卷四十一攷證

唐書明宗紀七癸丑索自通藥彥稠等奏收復河中

案通鑑作辛亥索自通拔河中斬楊彥溫癸丑傳首
來獻歐陽史亦作辛亥自通執彥溫殺之與是書較
詳

張延郎可充三司使班在宣徽使下 案宋史職官志

三司使在宣徽使後蓋仍後唐之制

淮南海州都指揮使王傳拯 王傳拯歐陽史作傳極

攷是書列傳及通鑑並作傳拯疑歐陽史傳刻之外訛

乙巳供奉官張仁暉自利州迴奏董璋攻陷閬州案董璋陷閬州通鑑作九月庚辰歐陽史作十月乙巳蓋以奏聞之日為據也

辛巳西面軍前奏今月十三日階州刺史王弘贄瀘州刺史馮暉自利州取山路出劍門關外倒下殺敗董璋守關兵士三千人收復劍州案通鑑攷異引唐

實錄作今月十三日大軍進攻入劍門次十七日收
下劍州是書統繫於十三日疑有舛誤

按巴堅舊作阿保機今改 托雲舊作突欲今改

舊五代史卷四十一 考證

欽定四庫全書

史部

舊五代史卷四十二

七至

詳校官編修_臣黃壽齡

洗馬_臣王坦修覆勘

總校官編修_臣朱鈐

校對官中書_臣吳翼成

謄錄監生_臣譚湘鏡

欽定四庫全書

舊五代史卷四十二

宋門下侍郎參知政事監修國史薛居正等撰

唐書第十八

明宗紀八

長興二年春正月庚申朔帝御明堂殿受朝賀仗衛如儀乙丑詔曰故天策上將軍太師尚書令楚國王馬殷品位俱高封崇已極無官可贈宜賜謚及神道碑文

仍以王禮堊壬申契丹東丹王托雲自渤海國率衆到
闕帝慰勞久之錫賚加等百寮稱賀丙子以沙州節度
使曹義金兼中書令丁丑東丹王托雲進本國印三紐
庚辰以靜江軍節度使馬賓卒廢朝贈尚書令丙戌荆
南節度使高從誨落起復加兼中書令二月己丑朔以
宋州節度使趙延壽為左武衛上將軍充宣徽北院使
癸巳詔貢院舊例夜試進士今後晝試排門齊入即日
試畢丁酉幸至德宮又幸安元信東丹王托雲之第辛

丑以鴻臚卿致仕賈馥卒廢朝以樞密院使守太尉兼
中書令安重誨為檢校太師兼中書令充河中節度使
進封沂國公己酉以右威衛上將軍陳皋為洋州節度
使詔諸府少尹上任以二十五日為限諸州刺史諸道
行軍司馬副使兩使判官以下賓職團練軍事判官推
官府縣官等並以三十日為限幕職隨府者不在此例
癸丑邠州節度使李敬周移鎮徐州詔禁天下開發無
主墳墓三月辛酉詔渤海國人皇王托雲宜賜姓東丹

名慕華仍授檢校太保東安都護充懷化軍節使瑞鎮
等州觀察等使其從慕華歸國部校各授懷化歸德將
軍中郎將先于定州擒獲蕃將特里袞宜賜姓狄名懷
惠扎古宜賜姓列名知恩並授檢校右散騎常侍錫里
扎拉宜賜姓原名知感裕勒古宜賜姓服名懷造奚王
副使格斯齊宜賜姓乙名懷宥三人並授檢校太子賓
客甲子以前鴻臚卿王瓊為太僕卿丙寅以皇子從珂
為右衛大將軍從珂自河中失守歸清化里第至是安

重誨出鎮河中帝召見泣而謂之曰如重誨意爾安得
更相見耶因有是命壬申以滄州節度使孔循卒廢朝
乙亥以西京留守權知興元軍府事王思同為山南西
道節度使充西面行營馬步軍都虞侯庚辰以少府監
聶延祚為殿中監以前雲州節度使楊漢章為安州節
度使乙酉太師致仕錢鏐復授天下兵馬都元帥尚父
吳越國王以其子兩浙節度使元瓘等上表首罪故有
是命丁亥以太常卿李勣為中書侍郎平章事集賢殿

大學士夏四月辛卯制德妃王氏進位淑妃詔錢鏐依舊賜不名誅內官安希倫以其受安重誨密指今于內中伺帝起居故也丁酉幸會節園宴羣臣因幸河南府詔罷州縣官到任後率斂為地圖又禁人毀廢所在碑碣戊戌詔今年四月禘饗太廟故昭義節度使李嗣昭故幽州節度使周德威故汴州節度使符存審並配饗莊宗廟庭己亥以前徐州節度使張虔釗為鳳翔節度使癸卯以汴州節度副使藥縱之為戶部侍郎前宗正

卿李諧為將作監甲辰以宣徽北院使左衛上將軍趙
延壽為檢校太傅行禮部尚書充樞密使乙巳潞州節
度使劉仲殷移鎮秦州帝幸龍門佛寺祈雨己酉天雄
軍節度使石敬瑭兼六軍諸衛副使辛亥以前鳳翔節
度使朱弘昭為左武衛上將軍充宣徽南院使壬子以
兵部尚書盧質為河陽節度使甲寅以遂州節度使夏
魯奇沒于王事廢朝詔曰久憊時雨深疚于心宜委諸
州府長吏親問刑獄省察冤濫見禁囚徒除死罪外並

放五月戊午朔帝御文明殿受朝庚申以三司使行工部尚書張延朗為兗州節度使辛酉詔近聞百執事等或親居內職或貴列廷臣或宣達君恩或勾當公事經由列鎮干撓諸侯指射職員安排親昵或潛示旨意或顯發書題自今後一切止絕有所犯者發薦人貶官求薦人流配如逐處長吏自循人情只仰被替人詣闕上訴長吏罰兩月俸發薦人更加一等被替人却令依舊甲子都官郎中知制誥崔棣上言請搜訪宣宗已來野

史以備編修從之丁卯詔諸州府城郭內依舊禁麴其
麴官中自造減舊價之半貨賣應田畝上所徵麴錢並
放鄉村人戶一任私造時甚便之戊辰中書奏應朝臣
丁憂者望加頒賚從之丁丑以祕書監劉岳為太常卿
己卯以武德使孟漢瓊為右衛大將軍知內侍省充宣
徽北院使辛巳以前相州刺史孟鵠為左驍衛大將軍
充三司使甲申以權知朗州軍州事守永州刺史馬希
範為洪州節度使檢校太傅以權知桂州軍府事富州

刺史馬希彞為鄂州節度使檢校司徒乙酉以左金吾
大將軍薄文為晉州留後鴻臚卿柳膺將齊即文書賣
與同姓人柳居則伏罪大理寺斷當大辟緣經赦減死
追奪見任官終身不齒詔應見任前資守選官等所有
本朝及梁朝出身歷任告身並仰送納委所在磨勘換
給公憑只以中興已來官告及近受文書叙理其諸色
蔭補子孫如非虛假不計庶嫡並宜叙錄如實無子孫
別立人繼嗣已補得身名者只許叙蔭一人其不合叙

使文書限百日内焚毀須絕此後更敢將合焚文書參選求仕其所犯之人並傳者並當極法應合得資蔭出身人並須依格依令施行閏月庚寅制河中節度使檢校太師兼中書令安重誨可太子太師致仕是日重誨男崇緒等潛歸河中以右散騎常侍張文寶為兵部侍郎夔州節度使安崇阮棄城歸闕待罪于閤門詔釋之時董璋寇峽内諸州崇阮望風遁走壬辰陝州節度使李從璋移鎮河中癸丑升廬州為昭順軍甲午以衡州

刺史姚彥章為昭順軍節度使丁酉安重誨奏男崇贊
崇緒等到州臣已拘送赴闕崇緒至陝州詔令下獄已
亥詔安重誨宜削奪在身官爵並妻阿張男崇贊崇緒
等並賜死其餘親不問壬寅以尚書左丞崔居儉為工
部尚書以吏部侍郎王權為尚書左丞丙午以隨駕馬
軍都指揮使宣州節度使安從進為陝州節度使丁未
以前中書舍人楊凝式為左散騎常侍戊申以右龍武
統軍王景戡為新州節度使己酉以右領軍上將軍李

肅為左金吾大將軍壬子以隨駕步軍都指揮使藥彥
稠為邠州節度使癸丑以邠州節度使劉行琮卒廢朝
贈太傅詔有司及天下州縣于律令格式六典中錄本
局公事書于廳壁令其遵行六月丁巳朔復置明法科
同開元禮乙丑以皇子左衛大將軍從珂依前檢校太
傅加同平章事行京兆尹充西京留守庚午以邠州節
度使張溫為右龍武統軍甲戌以魏徵八代孫韶為安
定縣主簿乙亥以鎮州節度使宋王從厚為興唐尹以

石敬瑭為河陽天雄軍節度使以天雄軍節度使石敬
班為河陽節度使依前六軍諸衛副使丙子詔諸道觀
察使均補苗稅將有力人戶出剩田苗補貧下不追頃
畝有嗣者排改檢括自今年起為定額乙卯定州節度
使李從敏移鎮州節度使盧質為滄州節度使庚辰皇
孫太子舍人重美授司勳員外郎重真已下六人並授
同正將軍及檢校官壬午以前秦州節度使李德琬為
定州節度使兼北面行營副招討使太原地震詔天下

州府斷獄先于案牘之上坐所該律令格式及新勅然後區分乙酉以前黔州節度使楊漢賓為羽林統軍詔止絕諸射係省店宅莊園秋七月庚寅以權侍衛馬軍都指揮使登州刺史張從實為壽州節度使兼侍衛步軍都指揮使壬辰福建王延鈞上言當境廟七所乞封王號勅如諸史傳有名宜封為閩越富義王其餘任自于境內祭享乙未詔諸道奏薦州縣官使相先許一并薦三人今許薦五人不帶使相先許薦二人今許薦三

人直屬京防禦團練使先許薦一人今許薦二人詔應
州縣官內有曾在朝行及曾佐幕府罷任後準前資朝
官賓從別處分其帶省銜并內供奉裏行及諸已出選
門者或降授令錄罷任後並依出選門例處分便與除
官更不在赴常調州縣官其間書得十六考者準格叙
加朝散階亦準出選門例處分三司奏先許百姓造麴
不來官場收買伏恐課額不逮請復已前麴法鄉戶與
在城條法一例指揮仍據已造到麴納官量支還麥本

從之甲辰前晉州節度使朱漢賓授太子少保致仕庚戌大理正劇可久責授登州司戶刑部員外郎裴選責責授衛尉寺丞刑部侍郎李光序判大理卿事任贊各降一官罰一季俸坐斷罪失入也八月丙寅詔天下州府商稅務並委逐處差人依省司年額勾當納官以故鎮州節度使趙王王鎔男昭晦為朝議大夫司農少卿賜紫金魚袋繼絕也辛丑升虔州為昭信軍癸亥以太常少卿盧文紀為祕書監以祕書監馬縞為太子賓客

左監門上將軍羅周敬為右領軍上將軍前懷州刺史
婁繼英為監門上將軍乙丑詔大理寺官員等宜同臺
省官例升進法直官比禮直官任使仍于諸道贓罰錢
內每月支錢一百貫文賜刑部大理兩司其刑部于所
賜錢三分與一分丙寅以武平軍節度使馬希振依前
檢校太尉兼侍中充虔州昭信軍節度使詔百官職吏
應選授外官者考滿日並委本州申奏追還本司依舊
職行公事己巳太傅致仕王建立太子少保致仕朱漢

賓皆上章求歸鄉里詔內外致仕官凡要出入不在拘束之限辛未以翰林學士兵部侍郎劉昫守本官充端明殿學士以左拾遺直樞密院李崧充樞密直學士壬申以左龍武統軍李承約為潞州節度使癸酉詔文武百官五日內殿起居仍舊其輪次轉對若有封事訐非時上表朔望入閣待制候對一依舊制乙亥翰林學士工部侍郎竇夢徵卒丁丑以前西京副留守梁文矩為兵部尚書己卯詔不得薦銀青階為州縣官壬午詔應

有朝臣藩侯郡守凡欲營葬未曾封贈許追封贈禮部尚書致仕李德休卒九月丙戌以前兗州節度使符彥超為左龍武統軍己亥懷化軍節度使東丹慕華賜姓李名贊華改封隴西縣開國公應有先配諸軍契丹並賜姓名詔天下營田務只許耕無主荒田各召浮客不得留占屬縣編戶辛丑樞密使檢校太傅刑部尚書范延光加同平章事使如故壬寅以中書舍人封翹為禮部侍郎禮部侍郎盧澹為戶部侍郎癸卯許州節度使

李從溫移鎮河東詔天下州縣官不得與部內富民于公廳同坐辛亥詔五坊見在鷹隼之類並可就山林解放今後不許進獻冬十月戊午以前北京留守太原尹馮贇為許州節度使辛酉左補闕李詳上疏以北京地震多日請遣使臣往被慰撫察問疾苦祭祀山川從之先是太原留後密奏無敢言者及詳有是奏帝甚嘉之改賜章服丙寅詔應在朝臣寮藩侯郡守準例合得追贈者新授命後便于所司投狀旋與施行封妻蔭子準

格合得者亦與施行外官曾任朝班據在朝品秩格例合得封贈叙封者並與施行其補蔭據資蔭合得者先受官者先與收補後受官者據月日次第施行從之十一月甲申朔日有蝕之己丑日南至帝御文明殿受賀丁酉以翰林學士起居郎張礪為兵部員外郎知制誥充職以汝州防禦使張希崇為靈州兩使留後庚子以左威衛上將軍華溫琪為華州節度使福建節度使王延鈞奏誅建州節度使王延稟及其子繼雄壬寅詔今

後諸道兩使判官罷任一年與此擬書記支使防禦團練判官二年推巡軍事判官並三年後與此擬仍每遇除授量與改轉官資或階勲職次云以御史中丞劉贊為刑部侍郎以鳳州節度使孫岳充西面閭道使壬子鄆州奏黃河暴漲漂溺四千餘戶癸丑以給事中崔衍為御史中丞十二月甲寅朔詔開鐵禁許百姓自鑄農器什器之屬于夏秋田畝上每畝輸農器錢一錢五分乙卯改于西郊丁巳以彰武軍節度使劉訓卒庚朝庚

千以前利州節度使康思立為陝州節度使秦州地震
丁丑詔司司所過西川兵士家屬常令贍給

舊五代史卷四十二

舊五代史卷四十二攷證

唐明宗紀八壬申契丹東丹托雲自渤海國率衆到闕
案托雲歸唐五代春秋作二年正月蓋以到闕之
日為據歐陽史作四年十一月丙戌蓋以奏聞之日
為據

以沙州節度使曹義金兼中書令 沙州原本作汝州
今據通鑑改正

甲寅以遂州節度使夏魯奇沒于王事廢朝 案通鑑

庚月庚午李仁罕陷遂州夏魯奇自殺歐陽史作四月甲寅董璋陷遂州武信軍節度使夏魯奇死之蓋歐陽史以奏聞之日為陷城之月也

見禁囚徒除死罪外並放案歐陽史作乙卯以早赦流罪以下囚與是書作壬子異

詔安重誨宜削奪在身官爵並妻阿張男崇贊崇緒等並賜死案重誨見殺是書作閏月己亥歐陽史作閏五月丁酉五代春秋作五月

以前黔州節度使楊漢賓為羽林統軍 漢賓原本作
漢章考上文有雲州節度使楊漢章不應黔州節度
使與之同名今據通鑑改正

辛亥詔五坊見在鷹隼之類並可就山林解放 辛亥
歐陽史作丁亥通鑑從是書

托雲舊作突欲今改 哩家舊作惕隱今正 托古舊
則骨今改 錫里扎拉舊作舍利則刺今改 勒古
舊作械骨今改 格斯齊舊作竭失訖今改

舊五代史卷四十二攷證

欽定四庫全書

舊五代史卷四十三

宋門下侍郎參知政事監修國史薛居正等撰

唐書第十九

明宗紀九

長興三年春正月癸未朔帝御明堂殿受朝賀仗衛如
式丁亥陝州節度使安從進移鎮延州己丑遣邠州節
度使藥彥稠靈武節度使康福率步騎七千往方渠討

党項之叛者庚寅以前北京副留守呂夢奇為戶部侍郎辛卯以前彰國軍留後孫漢韶為利州節度使充西面行營副部署兼步軍都指揮使庚子契丹遣使朝貢辛丑秦王從榮加開府儀同三司兼中書令戊申詔選人文解不合式樣罪在發解官吏舉人落第次年免取文解中書門下奏請親王官至兼侍中中書令則與見任宰臣分班定位宰臣居左諸親王居右如親王及諸使守侍中中書令亦分行居右其餘使相依舊從之渤

海回鵬吐蕃遣使朝貢大理正張居祿上言所頒諸州
新定格式律令請委逐處各差法直官一人專掌檢討
從之二月乙卯制晉國夫人夏氏追冊為皇后丙辰幸
龍門詔故皇城使李從璨可贈太保詔出選門官罷任
後周年方詳擬議自于所司投狀磨勘送中書又詔罷
城南稻田務以其所費多而所收少欲復其水利資于
民間碾磴故也秦州秦州界三縣之外別有一十一鎮
人戶係鎮將徵科欲隨其便宜復置隴城天水二縣以

隸之詔從之甲子幸至德宮以右衛大將軍高居貞為
右監門衛上將軍庚午以前華州節度使李從昶為左
驍衛大將軍以前夔州節度使安崇阮為右驍衛上將
軍以前新州節度使翟璋為右領軍上將軍以右領軍
上將軍羅周敬為右威衛上將軍辛未中書奏請依石

經文字刻九經印板從之

五代會要長興三年二月中書門下奏請依石經文字刻

九經印板敕令國子監集博士儒徒將西京石經本各
以所業本經廣為鈔寫仔細看讀然後僉召能雕字匠
人各部隨帙刻印板廣頒天下如諸色人要寫經書並
請依所印刻本不得更使雜本交錯去愛日齋叢鈔云

通鑑載後唐長興三年二月辛未初令國子監校定九經雕印賣之又曰自唐末以來所在學校廢絕蜀毋昭裔出私財百萬營學館且請板刻九經蜀主從之由是蜀中文學復盛又曰唐明宗之世宰相馮道李愚請令判國子監田敏校定九經刻板印賣從之後周廣順三年六月丁巳板成獻之由是雖亂世九經傳布甚廣去王仲言揮麈錄云毋昭裔貧賤時嘗借文選于交游問其人有難色發憤異日若貴當板以鏤之遺學者後仕王蜀為宰相遂踐其言刊之印行書籍創見于此事載陶岳五代史補後唐平蜀明宗命太學博士李錡書五經仿其製作刊板于國子監為監中刻書之始去倚覺寮雜記云雕印文字唐以前無之唐末益州始有墨板後唐方鏤九經悉收人間所有經史以鏤板為正見兩朝國史此則印書已始自唐末矣案柳氏家訓序中和三年癸卯夏鑒興在蜀之三年也余為中書舍人旬休閑書于重城之東南其書多陰陽雜說占夢相宅九宮

五緯之流又有字書小學率雕板印紙浸染不可盡曉葉氏燕語正以此證刻書不始于馮道而沈存中又謂板印書籍唐人尚未盛行為之自馮瀛王始印五經自後典籍皆為板本大槩唐末漸有印書特未盛行後人遂以為始于蜀也當五季亂離之際經籍方有託而流布于四方天之不絕斯文信矣 甲戌靈武

奏都指揮使許審環等謀亂伏誅藥彥稠奏誅党項阿埋等十族與康福入白魚谷追襲叛黨獲大首領六人諸羌二千餘人孳畜數千及先刼掠到回鶻貨物詔彥稠軍士所獲並令自收勿得箕斂已卯以前河中節度使索自通為鄜州節度使懷化軍節度使李贊華進契

丹地圖詔司天臺除密奏留中外應奏厯象雲物水旱
及十曜細行諸州災祥一一並報史館以備編修壬午
樂彥稠進回鶻可汗先送秦王金裝胡韞為党項所掠
至是得之以獻帝曰先詔所獲令軍士自收今何進也
令彥稠却與獲者三月甲申契丹遣使朝貢靈武軍將
裴昭隱等二人與進奏官阮順之隱官馬一匹有司論
罪合抵法帝曰不可以一馬殺三人命笞而釋之丙申
西京奏百姓侯可洪于楊廣城內掘得宿藏玉四團進

納賜可洪二百緡絹二百匹庚子以前鄜州節度使孫
璋卒廢朝癸卯帝顧謂宰臣曰春雨稍多久未晴霽何
也馮道對曰水旱作沴雖是天之常道然季春行秋令
臣之罪也更望陛下廣敷恩宥久雨無妨于聖政也丁
未以神捷神威雄武廣捷已下指揮改為左右羽林軍
置四十指揮每十指揮立為一軍軍置都指揮使一人
庚戌帝觀稼于近郊民有父子三人同挽犁耕者帝閔
之賜耕牛三頭高麗國遣使朝貢以右領軍上將軍程

璋為右羽林統軍以前安州留後周知裕為左神武統
軍夏四月甲寅詔諸道節度使未帶使相及防禦團練
使刺史班位居檢校官高者為上加檢校官同以先授
者為上前資在見任之下新羅王金溥遣使貢方物戊
午中書奏準勅重定三京諸州府地望次第者舊制以
王者所都之地為上今都洛陽請以河南道為上關內
道為第二河東道為第三餘依舊制其五府按十道圖
以鳳翔為首河中成都江陵興元為次中興初升魏州

為興唐府鎮州為真定府望升二府在五府之上合為
七州餘依舊制又天下舊有八大都督府以靈州為首
陝幽魏楊潞鎮徐為次其魏鎮已升為七府兼具員內
相次升越杭福潭等州為都督望以十大都督府為額
仍據升降次第以陝為首餘依舊制十道圖有大都護
請以安東大都護為首防禦團練等使自來升降極多
今具見在其員依新定十道圖以次第為定從之契丹
累遣使求歸扎剌特哩袞等幽州趙德鈞奏請不俞允

帝顧問侍臣亦以為不可與帝意欲歸之會翼州刺史楊檀罷郡至闕帝問其事奏曰此輩來援王都謀危社稷陛下寬慈貸其生命苟若歸之必復向南放箭既知中國事情為患深矣帝然之既而只遣哲爾格錫里隨來使歸蕃不欲全拒其請也詔贈皇后曹氏曾祖父母為太傅太尉太師國夫人淑妃王氏曾祖父祖母為太子太保太傅太師國夫人壬戌前樞密使驃騎大將軍馬紹宏卒癸亥以懷化軍節度使李贊華為滑州節

度使初帝欲以贊華為藩鎮范延光等奏以為不可帝
曰吾與其先人約為兄弟故贊華來附吾老矣儻後世
有守文之主則此輩招之亦不來矣由是近臣不能抗
議甲子以太子賓客蕭遘為戶部尚書致仕乙丑以天
雄軍節度使宋王從厚兼中書令辛未以幽州節度使
趙德鈞兼中書令五月壬午朔帝御文明殿受朝詔禁
網羅彈射弋獵丁亥以二王後前詹事府司直楊延紹
為右贊善大夫仍襲封鄴國公食邑二千戶丁酉以太

子太師致仕孔勅卒廢朝興元奏東西兩川各舉兵相
持甲辰以文宣王四十三代孫曲阜縣主簿孔仁玉為
襄州龔邱令襲文宣公戊申襄州奏漢江大漲水入州
城壞民廬舍樞密使奏近知兩川交惡如令一賊兼有
兩川撫衆守險恐難討除欲令王思同以興元之師伺
便進取詔從之六月壬子朔幽州趙德鈞奏新開東南
河自王馬口至淤口長一百六十五里闊六十五步深
一丈二尺以通漕運舟勝千石畫圖以獻甲寅以權知

高麗國事王建為檢校太保封高麗國王丁巳衛州奏
河水壞堤東北流入御河戊午荆南奏東川董璋領兵
至漢州西川孟知祥出兵逆戰璋大敗得部下人二十
餘走入東川城尋為前陵川刺史王暉所殺孟知祥已
入梓州辛酉范延光奏曰孟知祥兼有兩川彼之軍眾
皆我之將士料其外假朝廷形勢以制之然陛下苟不
能屈意招攜彼亦無由革面帝曰知祥予故人也以賊
臣間謀故茲阻隔今因而撫之何屈意之有由是遣供

奉官李瓌使西川賁詔以賜知祥詔以霖雨積旬久未
晴霽京城諸司繫囚並宜釋放甲子以大雨未止放朝
參兩日洛水漲泛二丈廬舍居民有溺死者以前濮州
刺史武延翰為右領軍上將軍前階州刺史王宏贄為
左千牛上將軍金徐安潁等州大水鎮州旱詔應水旱
州郡各遣使人存問秋七月辛巳朔以天下兵馬元帥
尚父吳越國王錢鏐薨廢朝三日丙戌詔賜諸軍救接
錢有差戊子正衙命使冊高麗國王王建靈武奏夏州

界党項七百騎侵擾當道出師擊破之生擒五十騎追至賀蘭山下己丑兩浙節度使錢元瓘起復加守尚書令青州節度使王晏球加兼中書令秦鳳沔宋亳潁鄧大水漂邑屋損苗稼夔州赤甲山崩壬辰以前太僕卿鄭績為鴻臚卿以前兗州行軍司馬李鱗為戶部尚書乙未福建節度使王延鈞進絹表云吳越王錢鏐薨乞封臣為吳越王湖南馬殷官是尚書令殷薨請授臣尚書令不報戊戌太子賓客李光憲以禮部尚書致仕己

亥以前靈武節度使康福為涇州節度使幽州衙將潘
杲上言知故使劉仁恭于大安山藏錢之所樞密院差
人監往發之竟無所得以皇子西京畱守京兆尹從珂
為鳳翔節度使廢鳳州武興軍節制為防禦使并所管
興文二州並依舊隸興元府丁未以門下侍郎兼吏部
尚書同平章事監修國史趙鳳為檢校太傅同平章事
充邢州節度使詔諸州府遭水人戶各支借麥種及等
第賑貸八月辛亥青州節度使王晏球卒廢朝二日以

利州節度使孫漢韶兼西面行營招討使甲寅以前振武節度使張萬進為鄧州節度使己未以鄆州節度使房知溫兼中書令移鎮青州丙寅以宰臣李愚為門下侍郎平章事監修國史癸亥以湖南節度使馬希聲卒廢朝己卯吐蕃遣使朝貢九月壬午以鎮南軍節度使檢校太傅馬希範為湖南節度使檢校太尉兼侍中甲申荆南節度使檢校太傅兼中書令高從誨加檢校太尉兼中書令壬辰供奉官李瓌自西川迴節度使孟知

祥附表陳敘隔絕之由并進物先賜金器等環知祥甥也母在蜀故令環往馬環至蜀具述朝廷厚待之意知祥稱藩如初奏福慶長公主以今年正月十二日薨又奏五月三日大破東川董璋之衆于漢州收下東川又表立功將校趙李良等五人乞授節鉞部內刺史令錄已下官乞許墨制補授帝遣閤門使劉政恩充西川宣諭使乙巳契丹遣使自幽州進馬秦州地震冬十月己酉朔再遣供奉官李環使西川兼押賜故福慶長公主

祭贈絹三千匹并賜知祥玉帶先是兩川隔遠朝廷兵士不下三萬人至是知祥上表乞發遣兵士家屬入川詔報不允知祥所奏兩川部內文武將吏乞許權行墨制除補訖奏詔許之知祥所奏立功大將趙季良等五人正授節鉞續有處分襄州奏漢水溢壞民廬舍癸丑以太常卿劉岳卒廢朝己未以兵部侍郎張文寶為吏部侍郎以戶部侍郎藥縱之為兵部侍郎庚申辛至德宮因幸石敬瑭李從昶李從敏之第壬申大理少卿康

澄上疏曰臣聞安危得失治亂興亡誠不繫于天時固
非由于地利童謡非禍福之本妖祥豈隆替之源故雖
雉昇鼎而桑穀生朝不能止殷宗之盛神馬長嘶而玉
龜告兆不能延晉祚之長是知國家有不足懼者五有
深可畏者六陰陽不調不足懼三辰失行不足懼小人
訛言不足懼山崩川涸不足懼蟲賊傷稼不足懼此不
足懼者五也賢人藏匿深可畏四民遷業深可畏上下
相徇深可畏廉恥道消深可畏毀譽亂真深可畏直言

茂聞深可畏此深可畏者六也伏惟陛下尊臨萬國奄
有八紘蕩三季之澆風振百王之舊典設四科而羅俊
彥提二柄而御英雄所以不軌不物之徒咸思革面無
禮無義之輩相率悛心然而不足懼者願陛下存而勿
論深可畏者願陛下修而靡忒加以崇三綱五常之教
敷六府三事之歌則鴻基與五岳爭高盛業共磐石永
固優詔獎之澄言可畏六事實中當時之病識者許之
癸酉湖南馬希範荆南高重誨並進銀及茶乞賜戰馬

帝還其直各賜馬有差丁丑帝謂范延光曰如聞禁軍
戍守多不稟藩臣之命緩急如何驅使延光曰承前禁
軍出戍便令逐處守臣管轄斷決近似簡易帝曰速以
宣命條舉之十一月辛巳以三司使左武衛大將軍孟
鵠為許州節度使以前許州節度使馮贇為宣徽使判
三司以宣徽北院使孟漢瓊判院事壬午史館奏宣宗
已下四廟未有實錄請下兩浙荆湖購募野史及除目
報狀從之

五代會要載十一月四日史館奏當館昨為
大中以來迄于天祐四廟實錄尚未纂修尋

具奏間謹行購募勅命雖頒于數月圖書未貢于一編
蓋以北土州城久罹兵火遂成滅絕難可訪求切恐歲
月漸深耳目不接長為闕典過在攸司伏念江表列藩
湖南興壞至于閩越方屬勳賢弋鋌自擾于中原屏翰
悉全于外府固多奇士富有羣書其兩浙福建湖廣伏
乞詔旨委各于本道采訪宣宗懿宗僖宗昭宗以上四
朝野史及逐朝日厯銀臺事宜內外制詞百司沿革簿
籍不限卷數據有者抄錄上進若民間收得或隱士撰
成即令各列姓名請議爵賞

癸未以左僕射致仕鄭珏卒廢朝丁亥

以河陽節度使兼六軍諸衛副使石敬瑭為河東節度
使兼大同彰國振武威塞等軍蕃漢馬步總管時契丹
帳族在雲州境上與羣臣議擇威望大臣以制北方故

有是命己丑樞密使趙延壽加同平章事詔在京臣寮
不得進奉賀長至馬及諸物甲午日南至帝御文明殿
受朝賀己亥河中節度使李從璋加檢校太傅以右散
騎常侍楊凝式為工部侍郎庚子以祕書監盧文紀為
工部尚書以工部尚書崔居儉為太常卿以工部侍郎
鄭韜光為禮部侍郎乙巳雲州奏契丹主在黑榆林南
捺剌泊造攻城之具帝遣使賜契丹主銀器綵帛十二
月戊申朔供奉官丁延徽倉官田繼勲並棄市坐擅出

倉粟數百斛故也教坊伶官敬新磨受賄為人告帝令御史臺徵還其錢而後撻之癸丑幸龍門觀修伊水石堰賜丁夫酒食後數日有司奏丁夫役限十五日已滿工未畢請更役五日帝曰不惟時寒且不可失信于小民即止其役甲寅以太子賓客歸醵卒廢朝戊午以前宣徽使朱弘昭為襄州節度使康義誠為河陽節度使充侍衛親軍馬步軍都指揮使壬戌以吏部侍郎姚顗為尚書左丞以尚書左丞王權為禮部尚書以兵部侍

郎藥縱之為吏部侍郎以翰林學士中書舍人程遜為
戶部侍郎依前充職戊辰帝畋于近郊射中奔鹿是冬
無雪

舊五代史卷四十三

舊五代史卷四十三考證

唐明宗紀九遣邠州軍節度使藥彥稠邠州軍歐陽

史作靜難軍

藥彥稠奏誅党項阿埋等十族與康福入白魚谷 白

魚谷歐陽史作牛兒谷

戊午荆南奏東川董璋領兵至漢州西川孟知祥出兵

逆戰璋大敗 案通鑑孟知祥克東川在五月五代

春秋歐陽史俱作六月蓋以薛史奏聞之日為據

供奉官李瓌 李瓌通鑑作李存瓌唐人避莊宗諱故
去存字

秋七月辛巳朔以天下兵馬元帥尚父吳越王錢鏐薨
廢朝三日 案五代春秋七月吳王錢鏐薨蓋祇以
薛史廢朝之日為據也通鑑作三月庚戌與九國志
異

丙戌詔賜諸軍救接錢有差 按救接錢疑有舛誤考
冊府元龜亦作救接今仍其舊

癸亥以湖南節度使馬希聲卒廢朝 案通鑑馬希聲
卒在七月卒卯五代春秋從是書作八月

拉特哩衮舊作則刺惕隄今改 爾格錫里舊作則骨

舍利今改

舊五代史卷四十三 攷證

欽定四庫全書

舊五代史卷四十四

宋門下侍郎參知政事監修國史薛居正等撰

唐書第二十

明宗紀十

長興四年春正月戊寅朔帝御明光殿受朝賀仗衛如
式是日雪盈尺戊子秦王從榮加守尚書令兼侍中依
前河南尹判六軍諸衛事庚寅以端明殿學士尚書兵

部侍郎劉昫為中書侍郎平章事甲午正衙命使冊故
福慶長公主孟氏為晉國雍順長公主遣太常卿崔居
儉赴西川行冊禮哭厰內附庚子以前河東節度使李
從溫為鄆州節度使二月癸丑朔帝于便殿問范延光
內外見管馬數對曰三萬五千匹帝歎曰太祖在太原
騎軍不過七千先皇自始至終馬纔及萬今有鐵馬如
是而不能使九州混一是吾養士練將之不至也吾老
矣馬將奈何延光奏曰臣每思之國家養馬太多試計

一騎士之費可贍步軍五人三萬五千騎抵十五萬步

軍既無所施虛耗國力臣恐日久難繼帝曰誠如卿言

肥騎士而瘠吾民何益哉

五代會要上問見管馬數樞密使范延光奏天下常支草

粟者近五萬匹見今西北諸道蕃買馬者往來如市其郵傳之費中估之直日以四十五貫以臣計之國力十耗其七馬無所使財賦漸消朝廷甚非所利上善之十月敕沿邊藩鎮或有蕃部買馬可擇其良壯給券具數聞以丁巳以虔州節度使檢校太尉兼侍中馬希振為洪

州節度使以鄂州節度使馬希廣為檢校太尉同平章事充桂州節度使以廬州節度使兼武安軍副使姚彥

章為檢校太尉同平章事以靜江節度副使馬希範為
鄂州節度使故潞州節度使檢校太保康君立贈太傅
己未宋州節度使安元信加兼侍中濮州進重修河堤
圖沿河地名歷歷可數帝覽之愀然曰吾佐先朝定天
下于此堤塢間大小數百戰又指一丘曰此吾擐甲臺
也時事如昨奄忽一紀令人悲歎耳癸亥以西川節度
使孟知祥為劍南東西兩川節度使封蜀王三司奏當
省有諸道鹽鐵轉運使衙職員都押衙正押衙同押衙

通引衙前虞候子弟今欲列為三司職名從之庚午以
御史中丞崔衍為兵部侍郎以右諫議大夫龍敏為御
史中丞三月己卯幸龍門延州節度使安從進奏夏州
節度使李仁福卒其子彛超自稱留後甲申鎮州奏行
軍司馬趙瓌節度判官陸浣元從押衙高知柔等並棄
市坐受賂枉法殺人也節度使李從敏罰一季俸乙酉
以西川節度副使知武泰軍節度兵馬留後趙季良為
檢校太保黔南節度使以西川諸軍馬步都指揮使知

武信軍節度兵馬留後李仁罕為檢校太傅遂州節度使以西川左廂馬步指揮使知保寧軍節度兵馬留後趙廷隱為檢校太保閬州節度使以西川右廂馬步都指揮使知寧江軍兵馬留後張知業為檢校司徒夔州節度使以西川衙內馬步都指揮使知昭武軍兵馬留後李肇為檢校太保利州節度使從孟知祥之請也丙戌賜宰相李愚絹百匹錢十萬鋪陳物一十三件時愚病帝令近臣翟光鄴宣問所居寢室蕭然四壁病榻敝

蘊而已光鄴具言其事故有是賜戍子以延州節度使
安從進為夏州留後以夏州左都押衙四州防遏使李
彝超為延州留後仍命邠州節度使藥彥稠宮苑使安
重益帥師援送從進赴鎮以左衛上將軍盧文進為潞
州節度使以右龍武統軍張溫為雲州節度使庚寅以
鳳翔行軍司馬李彥琮為鹽州防禦使時范延光等奏
請因夏州之師制置鹽州故有是命癸巳以右威衛上
將軍安重霸為同州節度使己亥以左龍武統軍符彥

超為安州節度使詔除放京兆秦岐邠濕延慶同華興
元十州長興元年二年係欠夏秋稅物及營田莊宅務
課利以其曾輦運供軍糧料也甲辰故晉國夫人夏氏
追冊皇后有司上謚曰昭懿從之夏四月戊申李勣超
奏奉詔除延州留後已受恩命訖三軍百姓擁隔未遂
赴任帝遣閤門使蘇繼顏齎詔促勣超赴任癸丑以刑
部侍郎劉贊為祕書監秦王傅五代會要長興四年四月以祕書監劉贊為秦
王傅前忠武軍節度判官蘇贊為秦王友前襄州觀察
使魚崇遠為秦王府記室參軍時言事者請為秦王置

師傳上顧問近臣皆以秦王名勢隆盛不敢置議請自選擇乃降是命

甲寅前鄧州節度

使梁漢顯以太子少師致仕太子賓客裴暉以兵部尚書致仕戊午追冊昭宗皇后何氏為宣穆皇后祔饗太廟百寮進名奉慰廢朝三日己巳以左散騎常侍任贊為戶部侍郎以吏部侍郎藥縱之為曹州刺史癸酉延州奏蕃部劫掠餉運及攻城之具守蘆關兵士退守金明鎮五月丙子朔帝御文明殿受朝戊寅皇子鳳翔節度使從珂封潞王新授戶部侍郎任贊改刑部侍郎贊

訴以所授官是丁憂闕故改焉皇子從益封許王鄆州節度使李從溫封兗王河府節度使李從璋封洋王鎮州節度使李從敏封濕王甲申帝避暑于九曲池既而

登樓風毒暴作聖體不豫翌日而愈

北夢瑣言上聖體乖和馮道對寢膳

之間動思調衛因指御前果實曰如食桃不康翌日見李而思戒可也初上因御李暴得風虛之疾馮道不敢斥言因奏事丙戌契丹遣使朝貢丁酉安從進奏大軍

諷悟上意

已至夏州攻城以其不受命也庚子以靈武留後張希崇為本州節度使辛丑故夏州節度使朔方郡王李仁

福追封號王壬寅以前晉州留後薄文為本州節度使
六月丙午朔文武百寮宰臣馮道等拜章請于尊號內
加廣運法天四字凡拜三章詔允之詔宮西新園宜名
永芳園其間新殿宜名和慶殿丙辰秦王從榮加食邑
至萬戶實封二千戶丁巳以右驍衛上將軍李從昶為
左龍武統軍以前邢州節度使高允韜為右龍武統軍
以右驍衛上將軍羅周敬為左羽林統軍以右監門上
將軍婁繼英為金州刺史戊午宋王從厚加食邑至萬

戶實封一千戶壬戌以前涇州節度使李金全為滄州節度使癸亥詔御史中丞龍敏等詳定大中統類甲子第十四女封壽安公主第十五女封永樂公主戊辰以前利州節度使孫漢韶為洋州節度使壬申永寧軍節度使容州管内觀察使檢校太尉兼侍中馬存加食邑實封甲戌帝復不豫秋七月丁丑以著作佐郎尹拙為左拾遺直史館國朝舊制皆以畿赤尉直史館今用諫官自拙始從監修李愚奏也已卯東岳三郎神贈威雄

大將軍初帝不豫前淄州刺史劉遂清薦泰山僧一人
云善醫及召見乃庸僧耳問方藥僧曰不工醫嘗于泰
山中親睹嶽神謂僧曰吾第三子威靈可愛而未有爵
秩師為我請之宮中神其事故有是命識者嫉遂清之
妖佞焉詔應臺官出行須令人訶引使軍巡職掌等規
避壬午詔安從進班師時王師攻夏州無功故也乙酉
以許州節度使孟鵠卒廢朝贈太傅詔賜在京諸軍將
校優給有差時帝疾未痊軍士有流言故也丁亥兩浙

節度使檢校太傅守中書令錢元瓘封吳王八月戊申
帝被袞冕御明堂殿受冊徽號曰聖明神武廣運法天
文德恭孝皇帝禮畢制大赦天下常赦所不原者咸赦
除之己酉賜侍衛諸軍優給有差時月內再有頒給自
茲府藏無餘積矣辛亥以晉州節度使薄文卒廢朝丁
巳以右龍武統軍李從昶為許州節度使戊午以祕書
監高輅卒廢朝辛酉以太子太師致仕符習卒廢朝贈
太師辛未秦王從榮以本官充天下兵馬大元帥加食

邑萬戶實封三千戶以右羽林統軍翟璋為晉州節度使以太子賓客馬縞為戶部侍郎壬申幸至德宮九月甲戌以戶部尚書李璘為兵部尚書以前戶部尚書韓彥暉為戶部尚書丙子幸至德宮戊寅樞密使范延光趙延壽並加兼侍中依前充使中書奏元帥儀注諸道節度使以下帶兵權者階下具軍禮叅見其帶使相者初見亦展一度公禮天下軍務公事元帥府行帖指揮其判六軍諸衛事則公牒往來其官屬軍職委元帥府

奏請從之癸未以兵部侍郎盧詹為吏部侍郎丙戌宰
臣馮道加左僕射李愚加吏部尚書劉昫加刑部尚書
戊子河陽節度使兼侍衛親軍都指揮使康義誠山南
西道節度使檢校太傅張虔釗並加同平章事宣徽南
院使判三司馮贇依前檢校太傅同平章事中書門下
同二品充三司使贇亡父名章故改平章事為同二品
壬戌永寧公主石氏進封魏國公主興平公主趙氏進
封齊國公主皇孫重光重哲並授銀青光祿大夫檢校

工部尚書秦王宋王子也前洋州節度使梁漢顯以太子少傅致仕丁酉以右龍武統軍高允韜為滑州節度使以韶州刺史檢校司空王萬榮為華州節度使萬榮王妃之父也戊戌以樞密使趙延壽為汴州節度使以襄州節度使朱弘昭為檢校太尉同平章事充樞密使時范延光趙延壽相繼辭退樞密務及朱弘昭有樞密之命又面辭訴帝叱之曰爾輩皆欲離朕左右怕在前素養爾輩將何用也弘昭退謝不復敢言吏部侍郎

張文寶卒庚子清海軍節度使錢元璠加檢校太傅同平章事中吳建武等軍節度使錢元璠加檢校太師兼中書令以前滑州節度使李贊華遙領虔州節度使辛

丑詔天下兵馬大元帥秦王從榮班宜在宰臣之上

五代

會要秦王從榮加兼中書令與宰臣分班左右定位及為天下兵馬元帥勅曰秦王位隆將相望重翬維委任既崇等威合異班壬寅以北面行營都指揮使易州刺史宜在宰臣之上

史楊檀為振武軍節度使冬十月丙午以前同州節度使趙在禮為襄州節度使丁未以前滑州節度使張敬

詢卒廢朝以邢部侍郎任贊為兵部侍郎充元帥府判
官戊午以前鳳翔節度使孫岳為三司使庚申以樞密
使范延光為鎮州節度使以三司使馮贇為樞密使辛
酉以前潞州節度使李承約為左龍武統軍以前威塞
軍節度使王景戡為右龍武統軍以左驍衛上將軍安
崇阮為左神武統軍以右監門上將軍高允貞為右神
武統軍壬戌以權知夏州事檢校司空李彝超為夏州
節度使檢校司徒丙寅詔在朝文武臣寮並與加恩以

受冊尊號也戊辰以前安州節度使楊漢章為兗州節度使以前雲州節度使張敬達為徐州節度使庚午以前兗州節度使張延朗為秦州節度使壬申秦州節度使劉仲殷移鎮宋州十一月丙子以前滄州節度使盧質為右僕射庚辰改慎州懷化軍為昭化軍升洮州為保順軍辛巳以保大軍節度使檢校太尉鮑君福為保順軍節度洮鄯等州觀察等使以彰義軍節度使檢校太尉同平章事杜建徽為昭化軍節度慎瑞司等州觀

察使乙酉以前汴州節度使李從暉為鄆州節度使以
鄆州節度使李從溫為定州節度使丙戌新授右僕射
盧質奏臣忝除官合赴省上事若準舊例左右僕射上
事儀注所費極多欲從權務簡只取尚書丞郎上事例
止屬南省屬寮及兩省官送上亦不敢輒援往例有費
官用自量力排比無不敢自臣隳廢前規他時任行舊
制從之戊子帝不豫己丑大漸自廣壽殿移居雍和殿
是夜四鼓後帝自御榻蹶然而興顧謂知漏宮女曰夜

漏幾何對曰四更因奏曰官家省事否帝曰省因唾出肉片如肺者數片便溺升餘六宮皆至慶躍而奏曰官家今日實還魂也因進溺一器侍醫進湯膳至曙帝小康士辰天下大元帥守尚書令兼侍中秦王從榮領兵陣于天津橋內出禁軍拒之從榮敗奔河南府遇害帝聞之悲駭幾落御榻氣絕而蘇者再繇是不豫有加癸巳馮道率百寮見帝于雍和殿帝雨泣哽噎曰吾家事若此慙見卿等百寮皆泣下霑襟甲午賜宰臣樞密使

御衣玉帶康義誠已下錦帛鞍馬有差遣宣徽使孟漢
瓊召宋王于鄴都乙未以三司使孫岳為亂兵所害廢
朝丁酉勅秦王府官屬除諸議參軍高輦已處斬外元
帥府判官兵部侍郎任贊配武州祕書監兼秦王傳劉
贊配嵐州河南少尹劉陟配均州並為長流百姓縱逢
恩赦不在放還河南少尹李堯配石州河南府判官司
徒詗配寧州秦王友蘇瓚配萊州記室參軍魚崇遠配
慶州河南府推官王說配隨州並為長流百姓河南府

推官尹諲六軍巡官董喬張九忠河南府巡官張沆李
潮江文蔚並勒歸田里應長流人並除名六軍判官殿
中監王居敏責授復州司馬六軍推官郭駿責授坊州
司戶並員外置所在馳驛發遣時宰相樞密使共議任
贊等已下罪馮道等曰任贊前在班行比與從榮無舊
除官未及月餘便逢此禍王居敏司徒詡疾病請假將
近半年近日之事計不同謀從榮所款昵者高輦劉陟
王說三人昨從榮稱兵指闕之際沿路只與劉陟高輦

並轡耳語至天津橋南指日影謂諸判官曰明日如今
已誅王居敏矣則知其冗泛之徒不可一例從坐朱弘昭
意欲盡誅任贊已下馮贇力爭之乃已戊戌帝崩于大內
之雍和殿壽六十七馮二月癸卯朔遷梓宮于二儀殿
宋王從厚自鄴都至是日發哀百寮縞素于位中書侍
郎平章事劉昫宣遺制宋王從厚于柩前即皇帝位服
紀以日易月一如舊制云明年四月太常卿盧文紀上
謚議曰聖制仁德欽孝皇帝廟號明宗宰臣盧文紀上

改聖智仁德四字為聖德和武欽孝皇帝宰臣劉昫撰
謚冊文宰臣李愚撰哀冊文是月二十七日葬于徽陵

五代史補明宗之在位也一旦幸倉場觀納時主者以
車駕親臨懼得其罪較量甚輕明宗因謂之曰且朕自
省事以來倉場給散動經一二十年未畢今輕量如此
其後銷折將何以償之對曰竭盡家產不足則繼之以
身命明宗愴然曰只聞百姓養一家未聞一家養百姓
今後每石加二斗耗以備鼠雀侵蠹謂之鼠雀耗倉糧
起自此也五代史闕文明宗出自邊地老于戰陳即
位之歲年已六旬純厚仁慈本乎天性每夕宮中焚香
仰天禱祝云某蕃人也遇亂世為衆推戴事不獲已願
上天早生聖人與百姓為主故天成長興間比歲豐登
中原無事言于
五代粗為小康

史臣曰明宗戰伐之勲雖高佐命潛躍之事本不經心
會王室之多艱屬神器之自至諒由天贊匪出人謀及
應運以君臨能力行于王國政皆中道時亦小康近代
已來亦可宗也儻使重誨得房杜之術從榮有啓誦之
賢則宗祧未至于危亡載祀或期于綿遠矣惜乎君親
可輔臣子非才遽泯烝嘗良可深歎矣

舊五代史卷四十四

舊五代史卷四十四攷證

唐明宗紀十以端明殿學士尚書兵部侍郎劉昫為中書侍郎平章事 案歐陽史劉昫傳作長興三年拜中書侍郎兼刑部尚書同中書門下平章事與本紀繫年先後互異見吳縝纂誤

二月癸丑朔 案上文正月為戊寅朔則二月不得為癸丑朔原文疑有舛誤

帝於便殿問范延光內外見管馬數 案錦繡萬花谷

引薛史作范延慶疑傳寫之訛

以刑部侍郎劉贊為秘書監 刑部侍郎通鑑作兵部

侍郎歐陽史從是書

以著作佐郎尹拙為左拾遺直史館 案五代會要尹

拙為左拾遺王慎徽為右拾遺並直史館是書闕載

王慎徽

戊子帝不豫 案歐陽史本紀十月壬申幸上和亭得

疾家人傳十一月戊子雪明宗幸宮西上和亭得傷

寒疾紀傳互異見吳縝纂誤

壬辰天下大元帥守尚書令兼侍中秦王從榮領兵陣
于天津橋內出禁軍拒之從榮敗奔河南府遇害

案五代春秋作壬午誅從榮蓋傳寫之訛歐陽史及
通鑑並從是書作壬辰

舊五代史卷四十四攷證